



13. juni 2024, Nuuk

Inatsisartut Suleriaasianni § 37, imm. 1 naapertorlugu apeqqutit tulliuuttut Naalakkersuisunut saqqummiuppakka:

Naalakkersuisunut apeqqutit:

- 1. Kalaallit Nunaanni inuussutissarsiornermi ineriartortitsinermik suliniutinut tigussaasumik iluaqutaasinnaasunik ikorfartukkamik ilisimatusarnernik ullumikkornit annertunerusumik atuinissamut Naalakkersuisut qanoq isumaqarpat?**
- 2. Ilisimatusartunik ilisimatusarnerisa inernerinik Kalaallit Nunaanni inuussutissarsiornermi ineriartortitsinermik suliniutinut tigussaasumik iluaqutaasumik atorneqarsinnaasunik qaninnerusumik siunnerfeqartumillu suleqateqarnissaq pilersinniarlugu periarfissat suut Naalakkersuisut takusinnaavaat?**
- 3. Naalakkersuisut maanna ilisimatusarnermi sulianik ataatsimut allatukkanik, inuussutissarsiornermik nutaanik ineriartortitsiffissatut piukkunnaateqarluartunik takussutissiisunik peqarpat?**
- 4. Arsuup Kangerluani Ikkami napasusar atorneqarnissaannut periarfissat maanna qanoq isikkoqarpat? Taakku atorneqarsinnaanerit pillugu ilisimatusarneq maanna ukiuni qulikkaarit arlalinni ingerlareerpoq.**
- 5. Kalaallit Nunaata marrarmik sersuarmersumik avammut tunisassiorluni aallartinnissaa qaqugu pisinnaava?**

(Inatsisartunut ilaasortaq Asii Chemnitz Narup, Inuit Ataqatigiit)

Tunngavilersuut:

Ukiorpassuanngortuni politikerit namminersorlutillu inuussutissarsiortut arlaqarnerusumik inuussutissarsiornermi toqqammaveqarnissap ineriartortinnissaata pisariaqassusaa isumaqatigiissutigaat. Tamanna isumaqatigaara. Nukinginnarseqqavorlu.

Ikkami napasuusani enzymit atorreqarsinnaanerannut periarfissat ilisimatusarfigineqarsimanerat, taakkulu atorlugit qaqorsaatinik atisanik ipeerutsitsilluni 10 gradiinnarmi errorsinnaanerat ilisimavarput.

Ilisimatusarnerup angusaqarfiunissaanut piffissap sivilisujunnaarnissaa neriunarpoq!

Det internationale klimapanel IPCC-p klimamut anguniakkat CO₂-mik aniatitsiunnaarnerinnakkut anguneqarsinnaannginnerat takutereerpaat. Maanna silaannatsinniittut ima annertutigileqqapput, allaat allatut ajornartumik taakku ilaasa peerneqarnissaat pisariaqarluni. Maanna nunarsuarmi **CO₂-mik katersinermi toqqorsinermilu** aningaasarsiorneq annertusiartorpoq. CCS-mik suliffissuaqarnermik sanarfinermi peqataanissarput Inuit Ataqatigiinnit kissaatigaarput.

Sermersuarmit marrarmik ilisimatusarluni suliaqarneq Inuit Ataqatigiit annertuumik soqutigalugu malinnaaffigaat. Marraap sermersuarneersup nunarsuarmi nunalerinermi atorreqarnerani CO₂ tonsit milliunilikkaat nungutinneqarsinnaanerat takutinneqarpoq. Taanna Kalaallit Nunaanni aningaasaqarnikkut siuariarnissamik periarfissiivoq. Tamatumalu saniatigut nunarsuarmut minguinnersusumut iluaqutsiilluni.